

Wam Ximotre Pawre kot Ximotre hwÿr kagà nê mẽn

Pawre na pre kagàja nhĩpêx. Kêp Jejus nhÿ hã hkrajê jahkre ho pa xwÿnhjê hõ na pre. Nê Ximotre kêp Pawre ho ajuta ho hkôt pa xwÿnh na pre. Tã hpãnhã krĩ pê Epes kamã arĩk nê Tĩrtũm kapêr o Jejus kôt hkwÿjê jahkre ho pa. Hãmri nhũm Pawre krĩ hõ kamã pa nê kagàja nhĩpêx nê hwÿr kumê. Nê kamã kãm mẽmoj tã karõ. Na pre ra Epes kamã mẽ hkwÿjaja Tĩrtũm kapêr o hêx o mẽ ahkre ho pa nhũm Pawre mẽ harênh ma nê kagàja kamã Ximotre mã tanhmã mẽ harênh to. Nê kot Tĩrtũm kapêr o Jejus kwÿjê jahkre mex xwÿnhjê xunhwÿr kaxyw kãm karõ. Nê Tĩrtũm kãm hprãm xà hkôt pix mã mẽ ahkre ho pa hã kãm karõ nê hwÿr kagà nê kumê. Nê kãm:

¹ Pa Ximotre? Xà amex? Ixpê Pawre na pa awÿr kagà nhĩpêx nê kumê. Ixte Jejus Kris nhÿ hã mẽ ahkre ho ixpa kaxyw na pre Mẽpapytâr xwÿnh Tĩrtũm mẽ Jejus Kris wa ixta nê ixãm. Jejus kamã na pu htem pajamak rãhã ho ri papa.

² Nà ra ate ixkapêr mar xà hkôt Jejus kôt amnhĩ xãm jakamã te apê ixkra pyræk Ximotre. Jakamã na pa hte ato Mẽpanhĩpêêxà maati Tĩrtũm mẽ panhõ Pahihti Jejus Kris wa hwÿr o ixpa nê ato wa hwÿr o:

—Pa Tĩrtũm mẽ Pahihti wa. E Ximotre ho na pa war awÿr kaxyw. Kwa kêr ka wa kamã axukapri nê kutã war anojarêt rãhã ho wa ri apa. Kot kaj

wa ã ho mex anê nhũm war anhỹ hã hamakêtkati
nê àmnhĩx pa ho pa.

Anhỹr o na pa hte war ato kuwỳ

Tĩrtũm kapêr o mẽ ahkre xwỳnhjê jarênh

*Rômãn 16.17; Wam Ximotre 6.3; Sikũn Ximotre
2.23; Xitre 1.5-16*

³ Nê na pu pre wa Epes kamã papa tã pika
pê Masetõn wỳr panojarêr nê tee ri Epes kamã
Tĩrtũm kapêr ho hêx o mẽ ahkre xwỳnhjê kapêr ma.
Jakamã na pa pre amã:

—E Ximotre kêr ka Masetõn wỳr ixkôt amôr kêr
nê. ãm jar Epes kamã arĩk nê ixwakre kamã
Tĩrtũm kapêr o mẽ hêx xwỳnhjê mã akapêr nê ã mẽ
hêx anhỹrja nê mẽ hkurê ho ri mẽ hkôt apa.

Anhỹr o amã harê hãmri nê Epes kamã are nê
ma Masetõn wỳr ahte mỗ. ⁴ Mẽ hêx xwỳnhjaja
amnepêm panhĩgêrja kot tanhmã amnhĩ nhĩpêx
to nê tanhmã ujarênh toja nhũm htem mẽ kãm
harênh pix o pa. Nê mẽ hixi piitã harênh o pa.
Na htem ã amnhĩ krã hkôt hkwỳjê mã ujarênh
anhỹr o pa. Jao axpên kwỳm ri mẽ ahkre nê mẽ
hã axpên mã àkjêr o pa. ã mẽ kot amnhĩ nhĩpêx
anhỹr jao Tĩrtũm nhỹ hã kãm hprãm xà hkôt mẽ
ahkre hkêr nê. Kojã mễhỗ Tĩrtũm nhỹ hã kapêr o
mẽ ahkre hãmri nê amnhĩ kaxyw kãm hamaxpêr
tỳx pê tanhmã mẽ ahkre hto. Nom ixte amã mẽ
harênh xwỳnhjaja Tĩrtũm nhỹ hã mẽ ahkre hkêr
jakamã na pa pre inhnojarêr nê ã amã mẽ harênh
anê nê mẽ kuri Epes kamã are.

⁵ Tã kêr ka arĩ mẽ ahkre ho ri mẽ hkôt apa
Ximotre. Nê Kris kôt mẽ pahkwỳjê mã anê
kê mẽ amnhĩ kaxyw Jejus kôt hamaxpêr tỳx pê

hamaxpêr mex o pa. Jao tanhmã hamaxpêr punuj to hkôt amnhĩ nhĩpêx kêt nê. Nê mẽ kãm anê kê mẽ te kãm amnhĩ tã ma pyràk o nhãm kãm mẽ hã ma ho pa. ⁶ Ixte amã mẽ hêx xwýnh jarênh xwýnhjaja na htem ã mẽ ahkre anhỹr kêt nê. Na htem htýx ri amnhĩ krã hkôt tanhmã mẽ ahkre hto. ⁷ Tĩrtũm kot finat Mojes mã mẽmoj tã karôja mẽ kot mar tỳx ã amnhĩ kamnhĩx nê ho mẽ ahkre hprãm tã no ãm hprĩ hã mar kêt nê htýx ri ho mẽ ahkre ho pa. ⁸ Tĩrtũm kot Mojes mã mẽmoj tã karôja mex. Mẽ kot mar nê hkôt amnhĩ nhĩpêx o pa kaxyw na pre. ⁹ No na pre mẽ kot tãm amnhĩ nhĩpêx xwýnhjê mã ã hã karô anhỹr kêt nê. ãm mẽ kot amnhĩ tomnuij xwýnhjê mã na pre hã karô.

Mẽ kot mẽ õ pahi kapêr mar kêt xwýnhjê mã.

Nê mẽ kot Tĩrtũm kapêr nhĩrôp kuhê ho mẽ pa xwýnhjê mã.

Nê Tĩrtũm ã mẽ hpijaàm kêt xwýnhjê mã.

Nê mẽ kot mẽ hipêêxà nê mẽ katorxà hpar xwýnhjê mã.

¹⁰ Nê mẽ hprô kuhpa hã nhãm mẽnijê ho amnhĩkati xwýnhjê mã.

Nê mẽ mjên kuhpa hã nhãm mẽmyjê ho amnhĩkati xwýnhjê mã.

Nê mẽmyjaja kot mẽnijê kuhpa hã kãm amnhĩ kwý myjê hkĩnh nê mẽ ho amnhĩkati xwýnhjê mã.

Nê mẽnijaja kot mẽmyjê kuhpa hã kãm amnhĩ kwý nijê hkĩnh nê mẽ ho amnhĩkati xwýnhjê mã.

Nê mẽ kot mẽmoj to àhkĩnh nê nhãm mẽ kãm ho wênê o mẽ pa xwýnhjê mã.

Nê ri mẽ hêx o mẽ pa xwýnhjê mã.

Ã mẽ kot Tĩrtũm kapẽr kwỳm ri amnhĩ nhĩpêx anhỹr o mẽ pa xwỳnh piitã mẽ kaxyw na pre Mojes mã mẽmojta ã karõ. Mẽ kãm Jejus prãm kêt xwỳnhjê mã. Mẽ kot mar nê tãm amnhĩ nhĩpêx kaxyw. ¹¹ Tã pa na pa hte Pahihti kot tanhmã mẽ panê amnhĩ nhĩpêx to hã harênh o ri mẽ hkôt ixpa. Ja kaxyw na pre Tĩrtũm ixãm. Tĩrtũmja mex o mex. Tãm na pre ja kaxyw ixãm.

Tanhmã Pahihti Jejus Kris kot Pawre ho mex to hã harênh

Atre 26.9-18

¹² Nê Pahihti Jejus Kris na hte ixto mex rãhã ho pa. Na hte tanhmã ixto pa ỹ hã mẽ piitã mẽ kãm tanhmã kot mẽ panê amnhĩ nhĩpêx to hã harênh o ri mẽ hkôt ixpa. Na pre ixte ã amnhĩ nhĩpêx anhỹrja kukamã inhmã ixàpênh ã karõ nê inhmã:

—E ate amnhĩ kaxyw ixkôt ajamaxpẽr mex jakamã kêr ka ma mẽ piitã mẽ hkôt ri mẽ kãm ixkapẽr jarênh o ri apa. Anê.

¹³ Nom amnepêm na pa pre hkôt ijamaxpẽr kêt nê. ãm axtem nê haprỳ rũnh nê ho ixkapẽr punuj o ri ixpa. Nê hkwỳjê ho ixkrihkrit nê mẽ haprỳ nê mẽ hta. Nom kormã amnhĩ kaxyw Kris kôt ijamaxpẽr kêt jakamã ixtỳx ã mẽ hipêx anhỹr o ixpa nhũm Pahihti ja hã ixpumu nê ixkamã ukaprĩ nê mẽ hã tanhmã ixto hkêt nê. ¹⁴ Nê kãm ijapê xàj mẽmoj to ixkutã nojarêt rãhã ho pa nê tanhmã ixkrã hto pa ra amnhĩ kaxyw hkôt ijamaxpẽr nê hkôt amnhĩ xãm. Hãmri nê kukwak ri ra inhmã hkwỳjê hkĩnh nê hpãnhã mẽ ho mex o ri mẽ hkôt ixpa.

15 Nê Jejus Kris ra wrỳk nê mẽ pahte amnhĩ tomnuj piitã hpãnhã amnhĩrer kaxyw mẽ panê htyk ã harênhja na pa hte harênh o ri ixpa. ã kot amnhĩ nhĩpêx anhỹrja na mex o mex. Kê mẽ piitã kuma nê hã nohtỳx rãhã ho pa.

Kormã ixte hkôt amnhĩ xãm kêt ri na pa pre amnhĩ tomnuj tỳx kumrêx o mẽ piitã mẽ hakrenh
16 nhũm Tĩrtũm ixpumu nê ixkamã ukapĩ nê. Hãmri nê amnhĩ kaxyw ixãm. Mẽ piitã mẽ kot ja hã ixpumunh nê axpẽn mã ã ijarênh anhỹr kaxyw. Nê ijarênh o:

—Kwa Pawre na pre amnhĩ tomnuj tỳx kumrêx o pa nhũm Jejus Kris ja hã omu nê kamã gryk tokyx anhỹr kêt nê. Na pre tanhmã hkrã hto nhũm ra tãm amnhĩ nhĩpêx o pa. Kwa pu mẽ uràk nê amnhĩ kaxyw Jejus kôt pajamaxpêr nê hkôt amnhĩ xunhwỳ. Kêr pu mẽ Pawre pyrã nê nhỹrmã Tĩrtũm mẽ Kraja wa kuri pamex nê pahtĩr tũm nê papa ho papa.

Anhỹr o axpẽn mã ijarênh nê ixpyrà nê Jejus kôt amnhĩ xunhwỳr kaxyw na pre Tĩrtũm ã ixto mex anê. 17 Jakamã na pa hte kãm amnhĩ jarênh kaxyw nê kãm:

—Pa Tĩrtũm? Nà kapxipix apê Pahi Maati. Nê arãhã ho arãhã nê amex o amex. Mẽ ixte inhno ho aa apumunh kêt tã kapxipix apê Mẽinhĩpêxã maati. Tã koja nhỹrmã mẽ piitã ã amã amex o amex ã ajarênh anhỹr o pa. Anê.

Ximotre kot tanhmã Epes nhõ xwỳnhjê jahkre hto hã kãm karõ

Wam Korĩt 5.1-5

18 Nê te apê ixkra pyràk Ximotre. Tã kot paj mẽmoj tã amã karõ ka inhma nê inhmar tỳx nê.

Nà Pahшти Jeжus mã ate tanhmã amnhĩ nhĩpêx to ho apa kaxyw na pa prem axãm nhũm Tĩrtũm nhỹ hã kapêr o mẽ pa xwỹnhjaja axàpênh kukamã amã kapêr nê amã:

—E ate ma mẽ kãm Pahшти Jeжus jarênh o apa kaxyw Tĩrtũm kot axãm jakamã kêr ka ã amnhĩ nhĩpêx anhỹr o ri mẽ hkôt apa. Anê.

Tã kot paj ijaxwỹja kagàja kamã amã ixkapêr nê mẽmoj tã amã karõ. Ka mar tỳx nê hkôt amnhĩ nhĩpêx mex pê Tĩrtũm mã amnhĩ nhĩpêx mex o ri apa. Jao aprĩ hã mẽ kãm tanhmã Jeжus jarênh to ho ri mẽ hkôt apa. ¹⁹ Nê amnhĩ kaxyw Jeжus mã ajamaxpêr mex nê. Nê mẽmoj punuj pumu nê amã ho anhỹr prãm tã Jeжus nhỹ hã nê amnhĩ to htỳx nê ho anhỹr kêt nê. Jao tãm amnhĩ nhĩpêx ã amnhĩ pumunh mex o ri apa. Nom kot kaj ja nê amnhĩ to htỳx kêt nê tanhmã amnhĩ tomnuj to hãmri nê te ate Pahшти Jeжus kaga pyràk. Na pre pahkwỹjaja ã amnhĩ nhĩpêx anhỹr o hkaga nê axte kãm hamaxpêr kêt nê. ²⁰ Imênew mẽ Aresãnja na pre wa ã amnhĩ nhĩpêx anê nê tanhmã Tĩrtũm o kapêr punuj to. Mỳrapê na pa pre Satanasti nhĩhkram wa haxà. Kot tanhmã wa ho nhũm wa kot tee ri amnhĩ tomnujta ã amnhĩ pumunh nê tokyx tãm amnhĩ nhĩpêx nê axte ã amnhĩ nhĩpêx anhỹr kêt kaxyw.

2

Tanhmã mẽ pahte Tĩrtũm mã amnhĩ jarênh to hã mẽ pamã karõ

Rukre 11.2-4; Atre 10.34-35; Epes 6.18

¹ E kot paj hpãnhã tanhmã mẽ pahte Tĩrtũm mã amnhĩ jarênh to hã amã karõ Ximotre. Ka inhma

ně ixô ri ho mẽ pahkwỳjê jahkre ho ri mẽ hkôt apa. E ja kumrêx kot paj mẽ kaxyw amã hã karô. Kêr ka mẽ piitã mẽ ho Tĩrtũm wỳr ho ri pa. Nẽ kãm mẽ harê nẽ mẽ kaxyw mẽmoj tã axàhwỳr o ri apa. Kêr kê ama nẽ tanhmã mẽ ho mex to. Kê mẽ amnhĩ tã omu nẽ ã kãm kapêr anê nẽ kãm:

—Pa Tĩrtũm? Nà ãm hãmri na ka ã mẽ ixto mex anê. Amex o amex. Anê.

² Nẽ mẽ kãm anê kê mẽ õ pahi nẽ mẽ ho amnhĩptàr xwỳnh piitã mẽ ho ahwỳr o pa ho:

—Pa Tĩrtũm? Kwa kêr ka mẽ inhõ pahi mẽ mẽ kot mẽ ixto amnhĩptàr xwỳnh piitã tanhmã mẽ ho kê mẽ ixto mex o pa. Kêr pa mẽ ijamakêtkati nẽ ixàmnhĩx ixpa pẽ amã tanhmã amnhĩ nhĩpêx to ho ri ixpa. Nẽ ixàmnhĩx mẽ hkôt tãm amnhĩ nhĩpêx. Anê.

³ Kot puj mẽ ã mẽ ho mẽ papytàr xwỳnh Tĩrtũmja wỳr o papa anê nhũm mẽ pama nhũm ja kãm mex nẽ.

E kêr ka ã mẽ kãm ja hã karô anê Ximotre.

Tĩrtũm kãm mẽmoj prãm ã harênh

Sikũn Pêtre 3.9

⁴ Nẽ mẽ piitã mẽ kot kapêr mar nẽ amnhĩ kaxyw Jejus kôt hamaxpêr nẽ hkôt amnhĩ xunhwỳrja na Tĩrtũm kãm hprãm.

⁵ Ja kaxyw na pre mẽ pahwỳr Kra Jejus mẽ nhũm man mẽ pahwỳr wrỳ. Tĩrtũmja tapxipix na kêp Mẽpahpãm. Nẽ Kra Jejusja tapxipix na kot Tĩrtũm mã tãm mẽ paxunhwỳr mã xwỳnh. Ja kaxyw na pre amnhĩ grônh kôt wrỳ mẽ pahpyrà nẽ ã ho ã nẽ kato.

⁶ Hãmri nẽ gaa nẽ àptàr hãmri nẽ mẽ pahpiitã mẽ panê ty. Jao Tĩrtũm mã mẽ pahte amnhĩ tomnuj

piitã hpãnhã amnhĩrer pa. Tã mẽ pahpiitã mẽ pahte kot ã amnhĩ nhĩpêx anhỹr ã harênh mar nẽ tokyx hkôt amnhĩ xunhwỳrja na Tĩrtũm kãm hprãm.

⁷ Ja kaxyw na pre ixãm. Ixte Ijaew kêt xwỳnhjê mã Tĩrtũm kapêr jarênh o ri mẽ hkôt ixpa kaxyw. Nẽ Jejus nhỹ hã tanhmã mẽ kãm ixkapêr to ho ri ixpa kaxyw. Nẽ tanhmã kot mẽ panê amnhĩ nhĩpêx to hã harênh kaxyw. ãm hãmri na pa ã amnhĩ jarênh anẽ. Ixêx kêt. Na pa hte Ijaew kêt xwỳnhjê hkôt ixpa nẽ ã mẽ kãm ixkapêr anẽ nẽ mẽ kãm:

—E mẽ ate Tĩrtũm Kra Jejus kôt amnhĩ xunhwỳrja na Tĩrtũm kãm hprãm. Jakamã kwa mẽ tokyx amnhĩ kaxyw hkôt ajamaxpêr nẽ hkôt amnhĩ xunhwỳ. Anẽ.

Ikrêsti kamã tanhmã mẽ pahte amnhĩ nhĩpêx to hã mẽ pamã karõ

⁸ Nẽ kot kaj mẽ tũhã Tĩrtũm kapêr mar kaxyw axpên wỳr akuprõ. Hãmri nẽ Tĩrtũm mã amnhĩ jarê nom kêr ka mẽ mẽmoj tã axpên kamã agryk kamã kãm amnhĩ jarênh kêt nẽ. Rỳ mẽmoj tã axpên mã axàkjêr kamã kãm amnhĩ jarênh kêt nẽ. ãm tãm mẽ ajamaxpêr pix o kãm amnhĩ jarê. Nẽ tãm amnhĩ nhĩpêx kamã kãm amnhĩ jarê. Ja na inhmã hprãm. Tã kêr ka ã Epes nhõ xwỳnhjê mã ja hã akarõ anẽ Ximotre.

Mẽnijaja kot tanhmã amnhĩ nhĩpêx to kaxyw mẽ hã kãm karõ

Wam Korĩt 14.34; Epes 5.22; Xitre 2.3; Wam Pêtre 3.1-7

⁹ Nê kot paj hpãnhã Kris kôt mẽ pahtõxjaja tanhmã kot amnhĩ nhĩpêx to hã mẽ kaxyw amã karõ ka inhma. Nà mẽmyjaja kot mẽ omunh nê kãm mẽ hkĩnh prãm xàj kê mẽ htỳx ri mẽ noo mã tanhmã amnhĩ nhĩpêx to hkêt nê. Nê ja prãm xàj tanhmã ê jagjênh to hkêt nê rỳ tanhmã ri mrar to hkêt nê. Rỳ mẽ kãm mẽ hkĩnh prãm xàj ôkrexê mex jagjênh rỳ mẽ ìhkra kamã kàx mex jagjênh nê ri hã mẽ hkôt pa kêt nê. Rỳ ja kaxyw tanhmã ri amnhĩ kĩ jaxwỳr to nê ri hã mẽ hkôt pa kêt nê. Rỳ mẽ ê mex jagjê nê mẽ noo mã htỳx ri hpijaàm kêt o pa hkêt nê. Kê mẽmyjaja kãm mẽ hkĩnh prãm xàj ã htỳx ri amnhĩ nhĩpêx anhỳr o pa hkêt nê. ¹⁰ Mẽ kãm anê kê mẽ kãm Tĩrtũm mãn kĩnh xàj mẽ piitã mẽ kutã mẽmoj to nojarêr o pa.

¹¹ Nê mẽ kãm anê kê mẽ Tĩrtũm kapêr mar kaxyw mẽ pikuprõnh xà hwỳr agjê nê akryk Tĩrtũm kapêr mar o hkrĩ nê htỳx ri axpên mã kapêr o hkrĩ kêt nê.

¹² Nê kê mẽ ikrêsti kamã Tĩrtũm kapêr o mẽmyjê jahkre hkêt nê. Rỳ kamã mẽmoj tã tanhmã mẽ kãm karõ hto hkêt nê. ãm akryk Tĩrtũm kapêr mar o hkrĩ. ¹³ Mẽmo mỳrapê koja mẽ ã amnhĩ nhĩpêx anê? Nà na pre Tĩrtũm my kot wa finat Atãwja kumrêx nhĩpêx nê kormã hprõ Ewa o hapu nê hipêx. ¹⁴ Nê Atãwja na pre kagã kapêr mar nê hkôt amnhĩ nhĩpêx kêt nê. Prõ na pre mar xà hkôt Tĩrtũm kapêr nhĩrôp xa nê tanhmã amnhĩ tomnuj to. ¹⁵ Mỳrapê na htem mênijaja hpijagri ho hikwỳ nhũm mẽ hkrajaja à htỳx kãm hapôj. Tã nom koja mẽ Jesus kôt amnhĩ xunhwỳ nê ã ixte mẽ kaxyw amã mẽmoj tã karõ xà hkôt amnhĩ nhĩpêx hãmri nê

nhỹrmã mex kumrẽx nẽ htĩr tũm nẽ pa ho pa. E kêr ka ã mēnijê mã mēmoj tã karõ anẽ Ximotre.

3

Pastô kot tanhmã amnhĩ nhĩpêx to kaxyw mẽ hã kãm karõ

Xitre 1.5-9

¹ E kot paj hpãnhã tanhmã pastô jarēnh to. Koja mēhō kãm kêp Kris kwỳjê nhō pastô nẽ Tĩrtũm kapēr o mẽ ahkre hprãm nẽ ãm hãmri ã hamaxpēr anẽ. Ja mex. ² Jakamã koja mēhō kãm kêp pastô hprãm hãmri nẽ ã amnhĩ nhĩpêx anhỹr o apa.

Koja mẽ piitã mẽ noo mã tãm ri amnhĩ nhĩpêx.

Nẽ hprō pix tãnopxar o pa.

Nẽ mēmoj punuj kutã amnhĩ to htỳx nẽ.

Nẽ tãm hamaxpēr.

Nẽ àmnhĩx amnhĩ wỳr mẽ piitã mẽ kuwỳ.

Nẽ Tĩrtũm kapēr o mẽ ahkre mex nẽ.

³ No kê mẽ kagôxỳhti japrôr nẽ ho pipãnh o pa hkêt nẽ.

Nẽ àhkurê ho pa hkêt nẽ.

Nẽ mẽ piitã mẽ kamã ukaprĩ ho ri mẽ hkôt pa.

Jao mẽ kutã nojarêt rãhã ho pa.

Nẽ amnhĩm kàxpore rax o pikuprõnh prãm xàj tanhmã amnhĩ nhĩpêx to hkêt nẽ.

⁴⁻⁵ Nẽ hkrajê jahkre mex o pa nhũm mẽ kapēr ma nẽ hkôt amnhĩ nhĩpêx. Nẽ hã hpijaàm kãm tãm amnhĩ nhĩpêx.

Koja mẽ hkrajê jahkre mex kêt nẽ hãmri nẽ mãănēn Kris kwỳjê jahkre mex kêt nẽ.

Jakamã nhũm hkrajê mẽ Kris kwỳjaja tãm amnhĩ nhĩpêx kêt nẽ.

6-7 Nê kê mẽ kot Jejus kôt amnhĩ xunhwỳr kêt xwỳnhjê noo mã tãm amnhĩ nhĩpêx rãhã ho pa. Mẽ kot ja hã mẽ omunh nê mẽ hã hpijaàm o pa kaxyw. Nom koja mẽ tanhmã amnhĩ tomnuj to nhũm mẽ tee ri ja hã mẽ omu nê mẽ ho kapêr punuj nê. Satanasti kãm hprãm xà hkôt.

Nê kê mẽ kot Kris kôt amnhĩ xunhwỳr nyw xwỳnhjaja kêp pastô hkêt nê.

Koja mẽ kêp pastô hãmri nê mẽmo arĩgro hã tanhmã hamaxpêr to nê amnhĩ to rax prãm xà tanhmã amnhĩ to jarkrar to ho pa. Hãmri nhũm Tĩrtũm tee ri ja hã omu nê te kot Satanasti nhĩpêx pyràk o hipêx nê tanhmã homnuj to. Ja pymaj kê mẽ kot Kris kôt amnhĩ xunhwỳr nyw xwỳnhjaja kêp pastô hkêt nê.

E pastô na hte ã amnhĩ nhĩpêx anhỹr o pa kamã Jejus kwỳjê jahkre nê tanhmã mẽ ho ajuta hto ho mẽ hkôt pa Ximotre.

Mẽ kot Kris kôt hkwỳjê ho ajuta xwỳnhjê kaxyw mẽ hã kãm karô

Atre 6.1

8 Nê kot paj hpãnhã amã mẽ kot Kris kôt hkwỳjê ho ajuta xwỳnhjê jarê ka inhma Ximotre. Nà koja mẽhõ kãm Kris kôt hkwỳjê ho ajuta hprãm hã koja ã amnhĩ nhĩpêx anhỹr o pa.

Koja mẽ htỳx ri mẽmoj tã mẽ kãm hpêr o pikênh o pa hkêt nê.

Nê tanhmã mẽmoj to hêx to ho pa hkêt nê.

Nê kagôxỳhti japrôr nê ho pipãnh o pa hkêt nê.

Nê amnhĩm kàxpore ho pikuprôn nh nê ho rax prãm xà tanhmã amnhĩ nhĩpêx to hkêt nê.

9 Nê kê Tĩrtũm kapêr piitã hkôt hamaxpêr o pa. Ra Tĩrtũm kot mẽ pamã kapêr piitã ho amnhĩrĩt jakamã koja Kris kôt hkwỳjê ho ajuta xwỳnhjaja kapêr piitã hkôt hamaxpêr pê hkôt amnhĩ nhĩpêx mex rãhã ho pa.

10-13 Nê kê mẽ amnhĩ prõ pix tãnopxar o pa.

Nê pastô pyrã nê mẽ hkrajê jahkre mex nhũm mẽ hkôt ri amnhĩ nhĩpêx mex o pa.

Nê kê mẽ hprôjaja mjên pyrã nê mẽ piitã mẽ noo mã tãm ri amnhĩ nhĩpêx.

Nê hkwỳjê ho kapêr rỳ mẽ axpên jakwa kamã ri axpên mã mẽ hixi ho rêr o pa hkêt nê.

Nê mjên pyrã nê mẽmoj punuj kutã amnhĩ to htỳx o ri pa. Nê amnhĩ to mex rãhã nê.

E koja mẽhõ kãm Kris kwỳjê ho ajuta ho pa hprãm hã koja ã amnhĩ nhĩpêx anhỹr o pa. Nom kêr ka mẽ kot mẽ ho ajuta kaxyw mẽ unhwỳr tokyx anhỹr kêt nê Ximotre. Taxy mẽ kamã ama nê aprĩ hã mẽ kot ri tanhmã amnhĩ nhĩpêx to hã mẽ omu măn. Hãmri nhũm mẽ piitã mẽ mex ã mẽ harê ka mẽ hã mẽ ama nê rĩ kormã mẽ kot mẽ ho ajuta ho pa kaxyw mẽ unhwỳ. Hãmri nhũm mẽ amnhĩ tã omu nê axpên mã mex ã harê. Nê amnhĩ kaxyw Jesus Kris mã hamaxpêr mex o pa hã mẽ omu nê mẽ hã hpĩaàm o pa.

Pawre kot Ximotre mã amnhĩ jarênh

14 Nê inhmã awỳr inhmôr nê apumunh prãm Ximotre. Nom kot pa amnhĩ kukamã ã mẽmoj tã amã karõ nê hã kagã anê. 15 Kêr pa tokyx awỳr inhmôr kêt japêr ka ixte amã mẽmoj ã kagàta kamã harê nê ixkutêp ho mẽ ahkre ho ri apa. Mẽ kot mar nê hprĩ hã mẽ ã pastô nê mẽ kot mẽ ho ajuta ho mẽ

pa xwỳnhjaja kot tanhmã amnhĩ nhĩpêx to hã mẽ harênh mar kaxyw.

Mẽ pahpê Kris kwỳjaja mẽ pahpê Tĩrtũm kra jakamã na pu htem kapêr kôt ri amnhĩ nhĩpêx nẽ pakatàt kôt mẽ piitã mẽ kãm pakapêr o papa. Jao tanhmã mẽ kãm Jejus Kris jarênh to ho ri papa.

Pawre kot Jejus mex o mex ã mẽ grer jarênh

¹⁶ Nẽ Jejusja mex o mex. Amnepêm kormã mẽ pahte harênh mar kêt tã pu prem harênh ma hãmri nẽ mex o mex ã pagrer o papa. Nẽ pagrer o: Kris kêp Mẽpahpãm tã na pre mẽ pahwỳr wrỳ nẽ mẽ pahpyrà nẽ ì ho ì nẽ kato.

Nhũm pre Tĩrtũm Karōja mex o mex ã harê.

Nhũm Tĩrtũm kapêr o mẽ wrỳk xwỳnhjaja omunh o pa.

Nhũm ahpỳnhã pika piitã hwỳr tanhmã kot mẽ panê amnhĩ nhĩpêx to hã harênhja anghrà.

Nhũm hte mẽ hkwỳjaja harênh ma nẽ amnhĩ kaxyw hkôt hamaxpêr nẽ hkôt amnhĩ xunhwỳ.

Tã nhũm pika kamã àpênh jatur xàm kumẽ nhũm Tĩrtũm akupỳm amnhĩ wỳr ho api.

Na pu htem ã Jejus mex o mex ã pagrer anẽ.

4

Mẽ kot Tĩrtũm kapêr kwỳm ri tanhmã Kris kwỳjê jahkre hto xwỳnhjê jarênh

Matêwre 24.4-13; Korosẽ 2.16-19; Sikũn Ximotre 3.1-9; Sikũn Pêtre 2.1-3; Jutre 3-16

¹ Nẽ nhỹrmã Jejus akupỳn mẽ pahwỳr wrỳk kaxyw koja pika nhõ xwỳnh kwỳjaja ma hkwỳjê mã tanhmã Tĩrtũm kapêr o hêx to ho pa. Nã

pre Tĩrtũm Karõ hprĩ hã mẽ hkukamã tanhmã mẽ harẽnh to. Koja xep Satanasti hkwỳjaja Jejus kwỳjê hwỳr mra nẽ hêx rom tanhmã mẽ kãm kapêr to. Satanasti nhỹ hã mẽ kãm hêx o pa nhũm mẽ hkwỳjaja mẽ kuma nẽ mẽ hkôt hamaxpêr nẽ Jejus kaga. Ầ koja mẽ Jejus akupỹn mẽ pahwỳr wrỳk kukamã amnhĩ nhĩpêx anẽ.

² Nẽ Satanasti nhỹ hã mẽ kãm mẽmoj to hêx xwỳnhjaja ầm Satanasti pix mar o pa jakamã koja mẽ hamaxpêr mex kêt nẽ. Koja mẽ mẽmoj punuj pumu nẽ htỳx mex ầ hkamnhĩx. ³ Tã koja mẽ Tĩrtũm kapêr kwỳm ri ầ Jejus kwỳjê mã hêx ho pa anẽ nẽ mẽ kãm:

—Kwa kêr ka mẽ axpẽn mã ri mẽ rer o apa hkêt nẽ. Tĩrtũm kãm ja prãm kêt. Ầm ahte ri mẽ papaja na kãm hprãm. Anẽ.

Nẽ mẽ kot mẽmoj mex kur ầ mẽ omu nẽ nê mẽ kãm kapêr nẽ mẽ kãm:

—Kwa na htem ata hkur kêt nẽ. Tĩrtũm pê omnuj kênã kot ka kêt ri aku.

Anhỹr o koja mẽ kãm kapêr o pa. ⁴ Nom Tĩrtũm na pre mẽ pamã mẽ apkur xà piitã ho kato. Mẽ paxàmnhĩx mẽ pahte piitã hkur o papa kaxyw. Jakamã mẽ pahpê hkrajaja na pu htem mẽmoj kaga hkêt nẽ. Na pu htem mẽmoj kur kaxyw nẽ Tĩrtũm mã harẽ hãmri nẽ paxàmnhĩx kuku. ⁵ Tĩrtũm kot mẽ paxàpkur xà piitã mex ầ harẽnh jakamã na pu htem kãm harẽnh pê paxàmnhĩx piitã hkur o papa.

*Pawre kot mẽmoj tã Ximotre mã karõ
Sikũn Ximotre 1.6-14; Xitre 2.1-8*

⁶ E Ximotre. Ixte mẽmoj tă amă karôta kêr ka ho Kris kôt pahkwỳjê jahkre mex o ri mẽ hkôt apa. Kot kaj ă mẽ ahkre anhỹr jao ra Jejus Kris mã axâpênh mex nê. Na ka pre harênh ma nê hkôt amnhĩ xâm hămri nê hkôt amnhĩ nhĩpêx mex nê. Tă kêr ka arĩ hkôt amnhĩ nhĩpêx mex rãhã kê mẽ piitã ja hã apumu.

⁷ Nê mẽ ujarênhja kot paj tanhmã amă hã karô hto. Mẽ panhĩgêt xujarênh kamã mo Tĩrtũm jarênh? Amrakati kumrêx. Jakamã kêr ka mẽ hkôt ajamaxpêr o ri apa hkêt nê. Ăm Tĩrtũm kapêr kôt pix mã ajamaxpêr tỳx rãhã ho ri apa. Tĩrtũm kapêrja ăm hămri na.

⁸ Nê na htem amnhĩ karo hprãm xàj tanhmã amnhĩ karo hto ho pa. Ja mex. Tanhmã kute hkêt. Na htem tanhmã amnhĩ karo hto nê gaa nê ra hkarore nê pa. No kêt mẽ kot Tĩrtũm kapêr kôt ri amnhĩ nhĩpêx o paja na mex o mẽ hkarota jakre. Na htem Tĩrtũm kapêr kôt ri amnhĩ nhĩpêx hămri nê mex nê hkĩnh nê pa ho pa. Hămri nê nhỹrmã kaxkwa kamã Tĩrtũm mẽ Kra Jejus wa kuri mex nê htĩr tũm nê pa ho pa. Ja na mex o mex. ⁹ ăm hămri ixte amă ja jarênh jakamã kwa kêr ka ja hã anohtỳx nê ri ho apa Ximotre.

¹⁰ Nê Tĩrtũmja rãhã ho rãhã. Tă na pu pre amnhĩ kaxyw Kra Jejus kôt pajamaxpêr nê hkôt amnhĩ xâm nhũm Tĩrtũm pahto hkra. Kăm mẽ piitã mẽ ho hkra hprãm jakamã na htem pahpyrà nê amnhĩ kaxyw Kra hkôt hamaxpêr nê hkôt amnhĩ xunhwỳ nhũm amnhĩ tă mẽ omunh xà hkôt mẽ ho hkra. Ja kaxyw na pu htem mẽ piitã mẽ kăm Jejus kot tanhmã mẽ panê amnhĩ nhĩpêx to hã harênh rãhã

o ri mẽ hkôt papa. Jao Tĩrtũm mã paxàpênh mex mẽ.

¹¹ E kêr ka ã ja ho pahkwỳjê jahkre anhỹr ho ri mẽ hkôt apa. Mẽ kot amar mẽ akapêr kôt amnhĩ nhĩpêx mex ho pa kaxyw.

¹² Nẽ kormã anyw tã kêr ka mẽ piitã mẽ noo mã tãm ri akapêr mẽ tãm amnhĩ nhĩpêx o apa. Mẽ kot Jesus ã tanhmã ato htã arĩ amnhĩ kaxyw kãm ajamaxpêr tỳx mẽ. Nẽ mẽ piitã mẽ kutã anojarêt mẽ ajamaxpêr mex pix o ri apa. Kot kaj kormã anyw tã ã mẽ noo mã amnhĩ nhĩpêx anẽ nhũm mẽ hã apumu mẽ kãm akapêr mar prãm mẽ. Anyw ã apumunh tã kãm akapêr mar prãm mẽ.

¹³ Nẽ kêr ka mẽ ate Tĩrtũm kapêr mar kaxyw axpên wỳr akuprô ka arĩ ixkutêp mẽ kãm Tĩrtũm kapêr tũm ã kagà kamã akapêr rãhã ho apa. Nẽ aprĩ hã tanhmã ho mẽ ahkre hto mẽ ho mẽ ahkre mex mẽ Ximotre.

¹⁴⁻¹⁵ E kêr ka ã amnhĩ nhĩpêx anhỹr o ri mẽ hkôt apa mẽ amã ho anhỹr kaga hkêt mẽ. Mẽ piitã mẽ kot ate Jesus mã amnhĩ nhĩpêx mex o amôr ã apumunh kaxyw. Kormã ate mẽ kãm Jesus jarênh o apa hkêt ri na pre pastô nhỹ hã mẽ kapêr xwỳnhjaja ate Jesus mã tanhmã amnhĩ nhĩpêx to ho apa kaxyw axãm. Hãmri mẽ anhĩmôk ã mẽ ìhkra jaxwỳ mẽ axàpênh kukamã tanhmã ajarênh to mẽ ato Tĩrtũm wỳ. Hãmri nhũm ate mẽ kãm kapêr jarênh o ri apa kaxyw amã ajamaxpêr o hihtỳx. Tã kêr ka ỹ hã ã kãm amnhĩ nhĩpêx anhỹr rãhã ho ri apa.

¹⁶ Nẽ kwa kêr ka amnhĩ pumunh mex mẽ Ximotre. Jao tãm ri amnhĩ nhĩpêx mẽ akatât kôt Tĩrtũm kapêr o mẽ ahkre ho ri mẽ hkôt apa. Kot kaj ã amnhĩ nhĩpêx anẽ hãmri nhũm mẽ ama mẽ apyrà

ně Jejus kôť amnhĩ xunhwỳ. Hămri nẽ pahpyrà nẽ nhỹrmã Tĩrtũm wa kuri htĩr tũm nẽ pa ho pa.

5

Tanhmã mẽ pahte Kris kôť mẽ pahkwỳjê nhĩpêx to kaxyw mẽ pamã karõ

Sikũn Ximotre 2.24-25

¹⁻² E kot paj hpãnhã Kris kôť pahkwỳjê hõ kot tanhmã amnhĩ tomnuj to nhũm ate tanhmã ja nẽ kãm akapêr to hã amã karõ.

Nà koja mẽhõ tanhmã ri amnhĩ tomnuj to ka harẽnh ma hămri nẽ ma hwỳr tẽ nẽ ja nẽ tanhmã kãm akapêr to. Nom kêr ka kãm akapêr mã agêt kêt nẽ.

Koja mẽwejjê õ tanhmã amnhĩ tomnuj to ka te kêp anhĩpêxà rỳ akatorxà pyràk o kãm akapêr. Jao hã apijaàm o tanhmã kãm akapêr to.

Rỳ koja apyrà nẽ mẽ nywjê hõ tanhmã amnhĩ tomnuj to ka te kêp atõ pyràk o kãm akapêr.

Rỳ mẽnijê nyw õ amnhĩ tomnuj japêr ka te kêp atõx pyràk o kãm akapêr. Jao hã apijaàm o kot amnhĩ tomnujja nẽ tanhmã kãm akapêr to.

E kêr ka mẽ kot amnhĩ tomnuj nẽ ã mẽ pahkwỳjê mã akapêr anhỹr o apa Ximotre.

Mẽ kêp mẽ mjên htyk xwỳnhjê jarẽnh

Xiakre 1.27

³ Nẽ kot paj hpãnhã Kris kôť pahkwỳ pẽ mẽ mjên htyk xwỳnhjê jarẽ. Nà koja mẽhõ nija hkra hkêt nẽ htàmnhwỳ hkêt nẽ pa nhũm mjên kêp ty ka mẽ apê Kris kôť hkwyjaja ja hã omu nẽ mẽmoj to kutã anojarêt rãhã ho ri apa. ⁴ Nom koja ra hkra rỳ ra htàmnhwỳ japêr kê mẽ tãmjaja tanhmã ho ajuta hto

ho pa. Kãm õ nẽ kãm mẽmoj nhõr o pa. Kormã mẽhprĩre ri na pre mẽ õ wôwô nẽ mẽ katorxà nẽ mẽ hipêêxà mẽ hamār mex pẽ mẽ kãm õ ho pa. Tã ra mẽ àptàr jakamã kê mẽ amnhĩ pyrà nẽ mẽ hamār mex pẽ mẽmoj to mẽ kutã nojarêr rãhã ho pa. Ja na Tĩrtũm kãm hprãm. ã mẽ kot hkwỳjê kamã ukapĩ ho pa jakamã te mẽ kot Tĩrtũm mã àpênh pyræk.

⁵ No koja mẽhõ ni ra wejre nẽ ahte ri pa. Nẽ hkra nẽ htãmnhwỳ hkêt nẽ ri pa. Tã kê ja hã amnhĩ pumu nẽ Tĩrtũm kamnàr rom amnhĩ to hwỳr o pa. Nẽ mẽ piitã mẽ ho hwỳr o pa. Jao tãm hamaxpêr. Ka mẽ apê Kris kôt hkwỳjaja ja hã omu hãmri nẽ mẽ kam nẽ tanhmã kutã anojarêr to ho ri apa. ⁶ No koja mẽ ã amnhĩ nhĩpêx anhỹr kêt nẽ. Nẽ htỳx ri mẽ grer wỳr mra nẽ hpĩaàm kêt o ri mra ka mẽ ja hã mẽ omu nẽ mẽ ho ajuta hkêt nẽ. Na htem ã amnhĩ nhĩpêx anhỹr o pa nẽ arĩ htữr tã te ra htyk nẽ hikwỳ pyræk.

⁷ E kêr ka ã ja hã Kris kôt pahkwỳjê mã karõ anẽ. Kê mẽ ama nẽ ã mẽ mjên htyk xwỳnhjê nhĩpêx anhỹr o pa. ⁸ Nom koja mẽhõ amnhĩ kwỳjê ho mex kêt japêr. Nẽ òrkwỳ kamã hprõ nẽ hkrajaja nẽ hipêêxà nẽ katorxà nhũm mẽ kãm mẽ apkur xà nhõr kêt japêr. Koja mẽ ã amnhĩ nhĩpêx anhỹr jao Jejus kaga nẽ te mẽ kot hkôt amnhĩ xunhwỳr kêt xwỳnhjaja kot amnhĩ nhĩpêx pyræk o amnhĩ nhĩpêx nom amnhĩ tomnuj tỳx o mẽ hakre.

⁹ Nẽ mẽ mjên htyk nẽ mẽ hkra nẽ mẽ htãmnhwỳ hkêt xwỳnhjaja kêr ka mẽ tanhmã mẽ ho ajuta hto kaxyw hãmri nẽ mẽ hixi piitã hã kagà. Nom kwa kêr ka aprĩ hã tanhmã mẽ amnhĩ nhĩpêx to hã mẽ omu nẽ rĩ kormã mẽ hixi hã kagà.

Koja mēhō kormã mjên htîr ri tãm hipêx nê nhãm mēmyjê ho amnhĩkati hkêr nê.

Nê ra hã amgrà pê 60 rý ra hã 60 jakre.

10-11 Nê tãm mē piitã mē hipêx o pa.

Nê hkrajaja kormã htîr ri nhũm mē hamãr mex nê mē ahkre mex o pa.

Nê nhãm krĩ hō nhō xwýnhjaja ò krĩ hwýr pøj nhũm mē omu nê amnhĩ nhõrkwy hwýr mē kuwý.

Nê mē kêp amrakati xwýnhjê ho mex o pa.

Koja mē ã amnhĩ nhĩpêx anê ka ja hã mē omu nê rĩ kormã mē ho ajuta kaxyw mē hixi hã kagà. Nom mē hixi hã kagà kaxyw nê mēmoj tã mē hkukja nê mē kãm:

—E kot kaj ã amnhĩ nhĩpêx anhýr o apa hã inhmã amnhĩ jarê pa ama nê rĩ kormã anhĩxi hã kagà.

Kot kaj axte amjên kêt nê.

Nê tanhmã Kris kôt akwýjê ho mex to ho ri apa.

Nhũm mēhō mēmo mýrapê hkaprĩ nê pa ka ja hã omu nê tanhmã ho ajuta hto.

E kot kaj ã amnhĩ nhĩpêx anhýr o apa hã amnhĩ jarê pa ama nê anhĩxi hã kagà. Hãmri nhũm Kris kôt akwýjaja amã axàpkur xà nhõr o pa. Anê.

Ã mē kãm akapêr anê nhũm mē ama nê amã:

—Ý. Ma kot paj ã amnhĩ nhĩpêx anê.

Anhýr ã amnhĩ jarê ka mē ama nê mē hixi hã kagà. No kormã mē hã amgrà pê 60 kêt xwýnhjaja kêr ka kormã mē hixi hã kagà hkêr nê. Koja mē tanhmã mē kot amnhĩ nhĩpêx to ho pa hã mē kãm karõja ma nê wam tajê pyrà nê amã:

—Ỗ. Ma kot paj ấ amnhĩ nhĩpêx anê. Na pa Jejus Kris noo mã ấ amnhĩ jarênh anê.

Anhỹr ấ amnhĩ jarênh tấ gaa nê ra hkurê hapôj nê ra kot amnhĩ jarênh ta kwỳm ri tanhmấ amnhĩ nhĩpêx to nê axte mjên. ¹² Ra amnhĩ jarênh o:

—Ma kot paj ấm Jejus mã pix mã tanhmấ amnhĩ nhĩpêx to ho ri ixpa nê axte inhmjên kêt nê.

Anhỹr tấ tanhmấ hamaxpêr to nê kot amnhĩ jarênh kwỳm ri axte mjên. Jao te Jejus mã amnhĩ to hêx pyrâk nhũm Tĩrtũm pê jamnuj. Ja pymaj kêr ka mê kormấ mê hấ amgrà pê 60 kêt xwỳnhjê nhĩxi hấ kagà hkêt nê. Kormấ mê hấ amgrà pê 60 kêt xwỳnhjaja arĩ mê hkĩnh tỳx ¹³ jakamấ kot kaj mê kãm mê apkur xà nhôr o apa nhũm mê ja hấ amnhĩ tấ mê apumu nê axte amnhĩm àpênh kêt nê. Ầm kãm kaga nê htỳx ri nhấm mê hwỳr mra nê nhấm mê hwỳr mra. Nê amnhĩ pumunh mex kêt nê htỳx ri axpên jakwa kamấ ri mê hixi ho rêr o pa. Nê nhỹri mêmoj pumu rỳ tanhmấ mêmoj jarênh mar to hấmri nê ma htỳx ri hkwỳjê mã harênh o mra. Koja mê ấ amnhĩ nhĩpêx anhỹr o pa hấmri nhũm mê kêp Kris kwỳ hkêt xwỳnhjaja ja hấ mê omu nê mê hkôt mê pahpê Kris kôt pahkwỳjê ho kapêr punuj nê. ¹⁴ ấ mê kot amnhĩ nhĩpêx anhỹr o pa pymaj kêr ka kormấ mê nyw xwỳnhjê mã anê kê mê mấmrĩ axte mjên nê o pa. Hấmri nê hkra nê hkrajê jamâr o pa. Ja na inhmấ hprấm. Koja mê ấ amnhĩ nhĩpêx anê hấmri nhũm mê kêp Kris kôt pahkwỳ hkêt xwỳnhjaja mê hkôt tanhmấ mê pahto kapêr punuj to hkêt nê. ¹⁵ Mấn ka ra Kris kôt pahkwỳjê nyw pê mê mjên htyk xwỳnh kwỳjaja tanhmấ amnhĩ tomnuj to hấ mê harênh ma. Na

prem Jejus kaga nê Satanasti hkôt amnhĩ nhĩpêx o pa.

¹⁶ E kêr ka mẽ ã Kris kwỳ pê mjên htyk xwỳnhjê nhĩpêx o apa anê Ximotre. Nom koja mẽ akwỳ kamã mễhõ nhõ wôwô mjên rỳ katorxà mjên kêp ty kê tãm kãm ô ho pa. Kêr kê Kris kôt pahkwỳjaja ãm mẽ kêp mẽ mjên htyk xwỳnh pê mẽ hkra nê mẽ htàmnhwỳ hkêt nê ahte ri mẽ pa xwỳnh pixjaja tanhmã mẽ ho ajuta hto ho pa.

Mẽ pahpê Kris kôt pahkwỳjê hkrăhtũm kaxyw mẽ pahtã kãm karõ

Atre 14.23; Wam Korît 9.7-14; Karatas 6.6; Wam Tesarôn 5.12; Wam Pêtre 5.1-4

¹⁷⁻¹⁸ Nê kot paj hpănha amã Kris kôt mẽ pahkrăhtũmjê jarê. Tĩrtũm kapêr ã kagà htũm kot mẽ harênh kot:

Kêr ka Tĩrtũm kapêr o mẽ ajahkre xwỳnhjaja mẽ ahkre pănha mẽ kãm amnhĩre. Anê.

Nê mãănên mẽ harênh ã kuxi nê mẽ harênh o:

Koja akrit amã àpênh o pa ka ho mex nê kãm ô mex o apa. Anê.

Ã ja jarênh kot anhỹr jakamã koja Kris kôt mẽ akrăhtũmja Kris mã tanhmã mẽ ato mex to ho pa ka mẽ amnhĩ tã kãm amnhĩrer mex o ri apa. Kot Tĩrtũm kapêr o mẽ ajahkre mex jakamã ka mẽ amnhĩ tã kãm amnhĩrer mex nê.

¹⁹ Nê koja mễhõ pixi nê mẽ awỳr tẽ nê amã Kris kôt mẽ akrăhtũm kot tanhmã amnhĩ tomnuj to hã harênh to ka ama nê ãm ama. Nom koja wa hamêxkrut rỳ mẽ axkrunêpxi nê mẽ awỳr mra nê axpên kôt tanhmã harênh to ka mẽ ama nê ãm hãmri mẽ kot tanhmã kot amnhĩ tomnuj tota kôt ajamaxpêr. ²⁰ Hãmri nê Kris kwỳjê piitã mẽ noo mã

kot amnhĩ tomnuj xwỳnh̃ta mã tanhmã kot amnhĩ tomnuj to nê kãm akapêr kê axte ã amnhĩ nhĩpêx anhỹr kêt nê. Mẽ piitã mẽ kot hã amar nê nhỹrmã tanhmã amnhĩ tomnuj to nhũm ate uràk nê hã tanhmã mẽ kãm axàkjêr to pymaj tanhmã amnhĩ tomnuj to hkêt nê.

²¹ E Tĩrtũm noo mã na pa ã amã mẽ kaxyw mẽmoj tã karõ anê Ximotre. Nê Jejus Kris mẽ Tĩrtũm kapêr o mẽ wrỳk xwỳnh̃jê noo mã pa ã amã karõ anê. Jakamã kêr ka inhmar tỳx nê hkôt amnhĩ nhĩpêx o ri apa. Jao mẽ piitã mẽ hipêx o axpên pyràk. Nom kêr ka akràmnhwỳ kot tanhmã amnhĩ tomnuj to hã omu nê axtem nê ãm omu nê ajamaxpêr o:

—Nà kêp ixkràmnhwỳ kênã kot paj kêt ja nê tanhmã kãm ixkapêr to. Pa ho anhỹr kêt nê.

Anhỹr o ajamaxpêr kêt nê. Mẽ piitã mẽ hipêx o axpên pyràk.

²² Nê kêr ka anojarêt kãm mẽ kot Tĩrtũm mã tanhmã amnhĩ nhĩpêx to ho mẽ pa kaxyw mẽ unhwỳr kêt nê. Aprĩ hã tanhmã mẽ kot amnhĩ nhĩpêx ã hã mẽ omu nê mẽ hkapi nê rĩ kormã mẽ unhwỳ rỳ tee ri mẽmoj tã mẽ omu nê mẽ hkaga.

Nê koja mễhõ tanhmã amnhĩ tomnuj to ka ja hã omu rỳ harênh ma hãmri nê uràk nê ã amnhĩ nhĩpêx anhỹr kêt nê. Arĩ Tĩrtũm kôt amnhĩ nhĩpêx pê tãm ri amnhĩ nhĩpêx pix o apa. ²³⁻²⁵ Na htem tễhã tanhmã amnhĩ tomnuj to nhũm mễhõ ja hã mẽ omu nê mẽ harênh kurê kumrêx. Kris kôt mẽ hkrãhtũm kormã kot tanhmã hã kãm nê hkêt ri nhũm mẽ ja hã mẽ omu nê tanhmã mẽ harênh to. Nom na htem tễhã hpimxur pê tanhmã amnhĩ tomnuj to nhũm Tĩrtũm pix ja hã mẽ omu. Tã koja

nhỹrmã mẽ piitã mẽ kãm ja ho amnhĩrĩt nhũm mẽ piitã harẽnh ma nẽ hkõt omu.

Nẽ mẽ kot amnhĩ to mex xwỹnhjaja haxwỹja. Na htem tōhã mẽ noo mã tanhmã mēhō ho mex to nhũm hkwỹjaja ja hã omu nẽ axpẽn mã mex ã mẽ harẽ. Nẽ tōhã hpimxur pẽ tanhmã mēhō ho mex to nhũm mēhō ja hã omunh kêt nẽ. Âm Tĩrtũm pix ã kot amnhĩ nhĩpêx anhỹr ã omu. Tã koja nhỹrmã mẽ piitã mẽ kãm ja ho amnhĩrĩt nhũm mẽ piitã harẽnh ma nẽ hkõt omu.

Nẽ kwa Ximotre. Axà nẽ anhōhymnuj nẽ ri apa jakamã kwa kêr ka gô pix o akôm o apa hkêt nẽ. Măănẽn wĩhti hkwỹ ho ixkō kêr ka anhōhy mex japêr.

6

*Mẽ kãm mẽ àpênh xwỹnhjê kaxyw mẽ hã kãm karō
Epes 6.5-9; Korosê 3.22–4.1; Xitre 2.9-10; Wam
Pêtre 2.18-25*

¹E kot paj mẽ akwỹjaja mẽ kãm mẽ àpênh o mẽ pa xwỹnhjê kaxyw mẽmoj tã amã karō. Mẽ kãm anẽ kê mẽ ã patrăw ã hpijaàm o ri pa. Jao mẽ kapêr ma nẽ hkõt kãm àpênh mex nẽ. Koja mẽ ã amnhĩ nhĩpêx anẽ nhũm amnhĩ tã mẽ omu nẽ hamaxpêr o:

—Kwa pêr Tĩrtũm kapêr na mex kumrêx. Inhmã àpênh xwỹnhja na hte hkõt amnhĩ nhĩpêx pẽ amnhĩ to mex o pa. Pêr âm hãmri na hte Pawre ho mẽ ahkre ho pa.

Anhỹr o hamaxpêr. ²Nẽ koja mẽ ã patrăw ra Kris kôt amnhĩ xãm japêr ka kãm mẽ àpênh xwỹnhjê mã anẽ kê Kris kôt mẽ kêp mẽ htō hã mẽ kãm àpênh mex o ri pa. Nom kê mẽ uràk nẽ kêp Kris kôt hkwỹ hã mẽ omu nẽ hamaxpêr o:

—Nà Kris kôt ixtō kênã kot paj kêt ri kapêr kôt amnhĩ nhĩpêx nê kãm ixàpênh mex o ri ixpa.

Anhỹr o hamaxpêr kêt nê. Kê kêp Kris kôt htō hã kãm ho mex prãm xàj kãm àpênh mex o pa.

E kêr ka mẽ kãm mẽ àpênh o mẽ pa xwỳnhjê mã ã tanhmã mẽ àpênh to ho pa hã karō anê Ximotre.

*Tĩrtũm kapêr kwỳm ri mẽ ahkre xwỳnhjê jarênh
Rukre 12.13-21; Xiakre 5.1-6*

³ Nê na hte Kris kwỳ hkêt xwỳnh kwỳjaja Kris kwỳjê mã Tĩrtũm kapêr o hêx o pa. Nê htỳx ri Jejus kapêr kwỳm ri tanhmã harênh to ho pa. ãm hãmri na Tĩrtũm mẽ Pahihti Jejus Kris wa kapêr tã nhũm htem htỳx ri tanhmã ho hêx to ho ri mẽ hkôt pa.

⁴ Mẽ kot amnhĩ to rũnh xwỳnh ã amnhĩ to jarkrar tã mẽ àhpumunh tỳx kêt. Na htem tanhmã Tĩrtũm kapêr kute hã axpên mã akir nê mẽmoj tã axpên kãm gryk o pa. Nê axpên mã kapêr punuj nê mẽmoj tã axpên kamnhĩx o pa. ⁵ Nê hamaxpêr mex kêt jakamã mẽmoj tã axpên mã àkjêr pix o pa. Na htem ã amnhĩ nhĩpêx anhỹr o Tĩrtũm kapêr mar tỳx kêt nê. Hãmri nê htỳx ri hamaxpêr nê hamaxpêr o:

—Kot paj Tĩrtũm kapêr o mẽ ahkre ho ixpa nhũm mẽ inhma nê inhmã amnhĩrer mex nê pa ixkàxpore rax nê ri ixpa. Nà kot paj ã amnhĩ nhĩpêx anhỹr o ri ixpa. Ja inhmã mex.

Anhỹrja o kãm hikàxpore rũnh prãm o amnhĩ to amnhĩrĩt o pa.

Kàxpore jarênh

⁶⁻⁸ E kot paj hpãnã amã tanhmã kàxpore jarênh to ka inhma Ximotre. Xà na pu htem pakatorxà nhõhy rũm pajapôj nê amnhĩ kôt kàxpore hkwỳ jamỳ nê ho pajapôj? Nà na pu htem pahkênh

ně panhỹ kamã pajapôj. Tã kot puj mẽ ja pyrà
 ně nhỹrmã ty ně mã ho aně ně panhỹ kamã ma
 papa. Jakamã kêr pu mẽ kormã pika ja kamã
 pahtĩr ně papa ri paxàpkur xà ně mẽ paxê pix
 tãnopxar pẽ pahkĩnh ně ri papa. Pakàxpore rũnh
 kêt tã na pu htem Tĩrtũm kamnàr rom pahkĩnh ně
 pajamakêtkati ně papa. Jao pajamexpěr o:

—Nà ixkàxpore rax kêt ně ixkukrêx rax kêt tã na
 hte Jesus ixkôt pa ho pa ně mẽmoj to ixkutã nojarêt
 rãhã ho pa. Jakamã ixkàxpore rax kêt tã ixkĩnh ně
 ijamakêtkati ně ixàmnhĩx ixpa.

Anhỹr o pajamexpěr o papa.

9-10 Mẽ kot amnhĩm kàxpore o pikuprõnh rũnh
 xwỳnhjaja na htem kàxpore pix kukamã hamexpěr
 o pa ně gaa ně kàxpore rũnh gryk ã amnhĩ tomnuj
 o pa. Na pre mẽ pahkwỳjaja kàxpore rũnh prãm
 xà Jesus kaga. Tã ra mẽ hikàxpore rũnh tã hkĩnh
 ně hamakêtkati ně pa hkêt ně. Na htem omnuj ně
 hkaprĩ ně pa. ã na htem mẽ hikàxpore rũnh xwỳnh
 kwỳjaja amnhĩ nhĩpêx anhỹr o pa. Jao kàxpore
 pix kukamã hamexpěr ně gaa ně ra gryk ã mẽ
 kot amnhĩ to mex xà kaga hpa ně htỳx ri tanhmã
 amnhĩ tomnuj to ho pa. Nẽ tanhmã hkwỳjê nhĩpêx
 punuj to. Te tutre kot harôj xành ã htỳx rapuuti
 hwỳr gjêx ně tee ri kãm kator prãm kaprỳ pyràk.
 ã mẽ kot amnhĩ nhĩpêx anhỹr o pa jakamã koja
 nhỹrmã Tĩrtũm ma mẽ kot amnhĩ xà htỳx kamã
 hamak tũm xà hwỳr mẽ kurẽ.

Pawre kot Ximotre mã mẽmoj tã karõ

*Korosẽ 4.17; Wam Ximotre 4.14; Sikũn Ximotre
 2.1-7*

¹¹ Nê kwa Ximotre kêr ka mẽ uràk nê kàxpore rax prãm xàj amnhĩ tomnuj o apa hkêt nê. Ate Tĩrtũm mã tanhmã amnhĩ nhĩpêx to ho apa xwỳnh jakamã kêr ka kãm hprãm xà hkôt pix mã amnhĩ nhĩpêx o ri apa. Jao Tĩrtũm pyrà nê ate amnhĩ jarênh xà hkôt amnhĩ nhĩpêx o ri apa. Nê amã Kris kôt akwỳjê hkĩnh pê mẽmoj to mẽ kutã anojarêr o ri apa. Nê Kris kôt mẽ hkwỹ hkêt xwỳnhjaja kot Kris ã tanhmã ato htã ka arĩ hkôt amnhĩ nhĩpêx mex nê mẽ piitã mẽ ho mex o ri mẽ hkôt apa. ¹² Na ka pre Kris kôt mẽ pahkwỳjê noo mã tanhmã amnhĩ jarênh to. Tĩrtũm kot amnhĩ wỳr awỳr nhũm ate Jejus kôt amnhĩ xãm nê amã kãm tanhmã amnhĩ nhĩpêx to ho apa hprãm ã amnhĩ jarê nhũm ikrêsti kamã mẽ piitã ja hã ama. Jakamã kwa kêr ka arĩ Jejus kôt amnhĩ nhĩpêx mex rãhã ho ri apa. Hãmri nê nhỹrmã Tĩrtũm mẽ Kra wa kuri amex kumrêx nê atĩr tũm nê apa ho apa.

¹³⁻¹⁴ E na pa mẽmoj tã amã karõ rax ka piitã kamã harê nê mar pa. Tã kêr ka inhmã ja hã tanhmã amnhĩ jarênh to. Mẽmoj piitã ho htĩr xwỳnh Tĩrtũm mẽ Jejus Kris wa noo mã tanhmã ja hã inhmã amnhĩ jarênh to. Jejus htyk kaxyw nê àmnhĩx kot Pahi Põn Pirat mã amnhĩ jarênh xwỳnhhta noo mã amnhĩ jarê nê inhmã amnhĩ jarênh o:

—Nà kot paj ate mẽmoj tã inhmã karõ piitã hkôt amnhĩ nhĩpêx rãhã nhũm Pahihti Jejus Kris akupỹn mẽ pahwỳr wrỳ. ãm hãmri na pa ã amã amnhĩ jarênh anê Pawre.

Anhỹr o inhmã amnhĩ jarê.

Tĩrtũm mex o mex ã mẽ grer

- 15 Nê koja Tĩrtũm akupỹn mẽ pahwỳr Jejus mẽnħ xà hã arĩgro jarẽ hãmri nhũm kot harẽnħ xàta wỳr pøj nhũm akupỹn mẽ pahwỳr kumẽ. Tĩrtũmja mex o mex. Tapxipix kęp mẽmoj piitã ho amnhĩptàr xwỳnh maati. Nê kęp jar mẽ ho amnhĩptàr xwỳnh piitã mẽ õ Pahi Maati.
- 16 Nê tapxipix na rãhã ho rãhã nê mex o mex jakamã puhã hirã rax kumrẽx. Tã hkĩnhã mẽ pahte amnhĩ tomnuj xwỳnh jakamã kot puj mẽ puhã hirã raxja kutã hkêt nê. Jao hwỳr mẽ pamrar kêt nê.

Nê aa mẽhõ kot no ho Tĩrtũm pumunh kêt tã kwa kêt pu mẽ pahpiitã kãm mex o mex nê hihtỳx o hihtỳx ã harẽnħ rãhã ho papa.

Axe mẽ hikàxpore rũnh xwỳnhjê jarẽnħ

Rukre 16.9

17 Nê kêt ka Kris kwỳjê kamã mẽ hikàxpore rũnh xwỳnhjê mã anê kê mẽ kot amnhĩ to rũnh kôt amnhĩ to àmra ho pa hkêt nê. Nê amnhĩ kaxyw mẽ hikàxpore rũnh kôt hamaxpěr o pa hkêt nê. Kàxpore na hte hapêx tokyx anê. Mẽ kãm anê kê mẽ hpãnħã amnhĩ kaxyw Tĩrtũm kôt mãn hamaxpěr tỳx rãhã ho pa. Na hte àmnhĩx tanhmã mẽ pahto mex to ho pa nê mẽ pahpê õxỳ hkêt nê. Jao mẽ pahwỳr na rẽ nhũm mẽ pahpur go mex nê pu mẽ kamã panhõ rũnh o papa. Nê mẽ pamã myyti ho hirã pu mẽ kukwak ri parĩt mex pê mẽmoj tã paxàpênħ o papa. ã Tĩrtũm kot mẽ pahto mex kot anhỹr pu mẽ kukwak ri pahkĩnh nê pajamakêtkati nê ri papa. Tã kêt ka mẽ hikàxpore rũnh xwỳnhjê mã anê kê mẽ amnhĩ kaxyw kumã pix mã mãn hamaxpěr

rãhã ho pa. ¹⁸ Nê mẽ kãm anê kê mẽ hikàxpore ho hkwyjê pê õxý hkêť nê ho tanhmã mẽ ho mex to ho pa. Nê àmnhĩx ho tanhmã mẽ kêp amrakati xwýnhjê ho ajuta hto ho pa. ¹⁹ Koja mẽ ã amnhĩ nhĩpêx anê nhũm Tĩrtũm ja hã mẽ omu nê hkĩnh nê õ krĩ kamã mẽ kutêp mẽ kãm mẽmoj mex o akuprõ. Jakamã nhũm mẽ kormã jar htĩr nê pa ri mex nê pa nê mãănẽn nhỹrmã kaxkwa kamã mex kumrêx o jar pika ja kamã mex nê pata jakre. E kêr ka ã mẽ hikàxpore rũnh xwýnhjê mã ja hã karõ anê Ximotre.

Pawre kot Ximotre mã mẽmoj tã karõ jatur xà

Korosê 4.17; Wam Ximotre 6.14; Sikũn Ximotre 1.13, 4.5

²⁰ Nê ra Tĩrtũm kot ate kapêr o mẽ ahkre ho apa kaxyw axãm jakamã kêr ka tãm amnhĩ nhĩpêx pê mẽ ahkre mex rãhã ho ri apa. Jao Tĩrtũm kapêr o hêx o ri mẽ ahkre xwýnhjê hkôt apa hkêť nê. Na htem mẽ kuma nê mẽ kapêr mex ã mẽ hkamnhĩx nom mẽ kapêr mex kêť. Jakamã kwa kêr ka mẽ kot tanhmã mẽ ahkre hto hã mẽ ama nê ãm mẽ ama. ²¹ Na pre ra mẽ pahkwýjaja mẽ kuma nê mẽ kapêr gryk ã Jejus kaga.

E ãm ja pix. Kê Tĩrtũm mẽ apiitã mẽ akutã nojarêť rãhã ho pa. Ixpê Pawre na pa ã amã ixkapêr ã kagà anê.

Tĩrtũm kapër ã kagà nyw
New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

xxx

2014-04-21

PDF generated using Haiola and XeLaTeX on 11 Nov 2022 from source files
dated 29 Jan 2022

383a4e22-34cd-505f-9cc2-2f9921e7aa9f